

四庫全書

集部

欽定四庫全書

明文海卷四十四

餘姚黃宗義編

賦四十四

花木二

瑞蓮賦 魏學禮

慈寧宮有蓮于花房中更挺花萼按花譜有臺蓮斯殆
類之然世未之覩也聖母之億壽皇孝之感孚國運萬
葉重華世治九寰彌靖厥兆茲矣上命圖示閣臣俾作

賦曰瑞蓮臣某謹拜手稽首而作頌曰粵皇天之眷德
昭太和之上禎蔚慈寧之荷萼吐芬艷之重英新姿崇
擢嘉蕤茂挺若鳳翼之翥霞效鳳閣之延穎超衆卉而
脩翹凌九華而彰影秀茁茁之令芳矯芙蓉以獨迥映
亭亭之竒采薦奕奕之秋光對月華以比曜度鸞幄而
飛香不彫琢而層臺出非烟霧而重雲翔於是瓊瑤奪
色蘭杜非芬藕千常而靡信花十丈以徒聞豈如結種
帝閭敷榮慈殿紺房表異丹葩呈倩鍾氣厚而加豐毓

神全而增炫拱秘寢而恩輝多近太液而露華羨拱揖乎
萬年之枝搖曳乎五明之扇祥不虛來而有感斯興瑞罕
昔聞而大衆咸見茲誠太母淵仁格乎上穹厚德齊乎地
極重以聖主大孝臻于古初隆化洽乎九域是用上至太
清而悉為醇鬯下至太寧而沾于羣植藉非若此何以萬方
弘遠而特徵于聖母之宮宇宙久長而肇開于今上之日
彼圖陳瑞應疑信相參曲奏芝房功德未廣逖觀前代遐綉
玄想治斯協于登三應有符于明兩畏天戒則躬步恭祈

振滂旱則捐租錫帑緩大辟以法解網之矜卹貸小過以宏肆眚之曠蕩海內欣欣其如春神祇穆穆而如響驗慈齡之永延應聖壽之高朗况蓮花以比君子重臺以示道長坤宮以母養萬物無疆以靜成萬象實太平之彰兆而億禩之有像于是天子方湛思乎道德之玄微克謹乎皇天之昭命治已隆而若冲祥薦膺而彌敬親賢人若芝蘭之宜就遠儉謙若枳棘之當迸視民為邦家之本根民歸比桃李之蹊徑三光順軌而內安外綏萬業承庥而武戢文順繪

圖即文武戶牖之銘而祥荷亦姬旦嘉禾之進矣

茉莉賦 魏學禮

猗絕域之名草植方夏之崇岡結繁柯以披翠榮芳華
以飄香幽蘭婉兮被中谷杜若發兮吐新綠千章檜兮
蔽丹曜百尋芬兮麗嘉馥爰有姣童豔媛褰蘿辟莽接
袂紛濟揮雲直上睹修條而佇瓊佩折榮敷而眇遐賞
翔縹霞兮鸞思飛排蔥烟而蕙情蕩遂乃和玉軫鐃瑤
弦送姿媚邀媿妍振芳裾而舞宛轉擢纖腕而歌便娟

歌曰時日晏兮涼風生來蒞藥兮衣羅輕山陰陰兮香
愁寂將媚卉兮遺佳人於是茂苑公子皇庭大夫騫雅藻
而抗淵標舒冲懷而激清奏馳神乎希妙之觀凝想于
瓌竒之觀邈嘉樹之來臻映璇階而逾秀弱英皓哲崇
繁霜兮敷氣逸靚浮朱房兮帷茵藹藹襲郁芳兮葉莖
翳蒼蒙雕堂兮九夏零雪映檀梁兮方疏泛綠錯丹光
兮金皞淒清華未央兮薄暉邈迤入犀觴兮空月徘徊翡
翠翔兮文石藻井跗製良兮翩翩蒨婉玉露瀼兮瞻霧

衣而比綠對皎顏而合素綺檻密而丹樓春荃除漠而
紺欄暮大夫于是撫娟冶之華蕤揆麗美之機緯鄙秦
聲而穆弘述薄燕音而鬯蔚旨才鋪肆而矯翰疾響耀
炫而寄神超煩雄章而照紫宿裁燦詞以卷朱霄

菊賦 俞允文

伊茲菊之貞麗挺庶類而擅竒含內美之醇精敷藻菁
之清儀翠葉掩以菴茂紫莖翕其襍襪迎上春而解作
凌九陽而振蕤越流芳于秋坂託纖根于幽岵糝五色

而相宣鬱彪炳其陸離狎鳳子來毛姬繡分苔選錦匣
烟陂影亂蕊河之燭光搖兔苑之芝足使華林掩緝琪
樹韜姿晃雕霞之驚絕藹繁星以紛非矧夫爽籟凝陰
涼颼送燠日短晷以向南雁違寒而度北露冷吳宮之
草波增漢臯之曲人有愁而必盡物無微而不肅天次
寥兮彌高木蕭槭兮就剥彼晚榮於此時曾靡踰于茲
菊匪負霜而淪操每遡颼而騰馥殖女几而蓄滋出甘
津于澹谷纂嘉名於流記閱上藥于丹籙若夫英隱考

槃仙徒邁俗或食英以充虛或擷藥以佩服或咀實以
引年或傳葩以代祝或咽液以療疴或沉醪以媚獨故
其為性也可以比德而延期其為芳也可以揚娥而表
淑粵有南國上公中朝元輔覽鳳圖以修文摠虎賁而
勵武道無謝于佐殷神有鍾于生甫玩玄月之改律又
朱明之徂暑欣年志之樂康省勛庸之豐偉而乃闢華
堂涉芳圃登貴客召真侶蒸蕙肴沃蘭醑集珠履兮翠
裾鏗鳳簫兮鼉鼓當令辰而璀璨撫物華而容與于是

南園逸叟東海遐賓祇聆勝事緬憶清塵慨契濶之既
久慚酬德之無因爰染毫于縑縞命蕪詞以俱敷歌曰
金商戾兮被勁楚月華白兮蟋蟀入戶清風乘兮輕袿
舉神怡愉兮美無度陽芳絢兮彌終古宜永御兮壽黃
耆須申頌兮承靈祐

瑞麥賦

陸深

僕閬居田野多見瑞麥兩岐三岐至五六岐彼九岐
者得于傳聞殆未之見云實有之感茲休禎造賦一

篇有頌有美有風有刺義主勸戒附于古詩人之諷
諫雖不足以希蹤相如子雲庶東京之流亞也示我
同志靡得而布焉

天子正德五祀孟月維夏知知子瘍發下體更朔新愈
有客唁焉登堂三揖乃掀髯吐論曰夫物有異產事有
竒遭談肉者不可與論味昧采者不可與即文濶哉希
乎今茲之所覩也子足良苦抑未之知乎知知子屢然
而起危襟橫几奉客下風曰唯唯願詔之客曰走故農

家五穀是理爰自弱齡勤厥四體今年逾知命而農穰
凡幾一畝三石稂莠吐米皆未若今歲之為瑞也麥苗
芄芄穰岐為二揚芒含穎復為三四多者五六將將覆
地東鄰一枝九岐尤異殆淳和之所薰蒸而上帝用以
錫類也周書異畝漢歌兩岐陋昔人之誇詡昭后皇之
惠慈雖蒙白之翁負玄之老皆緣畝玩視相與嗟咨若
走者齒髮猶盛涉歷未廣宜乎驚悸而黻頤也知知子
仰屋太息索然久之曰否否客何談之盍也夫緣物者

貴質敷文者適用且夫麟鳳之希難以療饑芝菌之祥
難以充庖雲錦之爛難以禦寒螻蚌之光難以續膏是
以聖明抑難得之貨壅不稽之言誠以重本而緩末棄
無益而即有用也客目覩岐麥津津稱瑞民瘼甚矣果
誰之致獨非客之所觀見者乎試為客語往歲己巳運
厄元元夏雲被壅淫雨注天晝夕閱七颶風相牽海波
怒而山立江潮噴以駿奔蛟龍舞于街衢岡阜淪為溝
淵漂尸橫野浮畜蔽川千里一壑萬竈絕烟于是百年

之完聚連邑之生全化為魚鼈葬于鯨鱣者殆過半矣
暨乎水退民失故居滄桑一變形勝都非朱門沈其閭
閱碧瓦盪為丘墟鳥窺巢而不下狐訪穴而重疑號哭
振野提負沿途父棄其子妻別其夫相與轉徙乞丐奔
逐投依若流星之逼曙而敗葉之離枝也于是強有力
者牢朽材于古岸塞行潦以腐薪依濕林為棟幹綴敗
席為閭閻溷糞無別卧食不分十併為五棄仇講鄰相
依為命朽腹連旬野無留菜樹不遺根傲倖于萬一苟

活于旦昏爾乃積陰鬱結隆冬盛寒層氷千丈竹栢枯
乾豈祝融之故都為玄冥之駢駮何曖曖之陽國顧風
烈于塞垣民無夙具習不素安于是受凍而仆者又如
干矣天子方軫念南服融照閭閻發德音大王言貸常
賦闢四門封簡書于芝檢勤使者于輜軒省大官之供
調減司寇之坐論賑倉廩之儲積蠲逋負之浩繁方將
奪民命于溝壑續生氣于遊魂蓋三五之罕有而二氣
所不能全之曠恩也良有司方憂經費之不足懼考課

之殿後鴻澤持而不下限令疾于電走朝四暮三示一
藏九使民破十家之產僅足以輸一家費數畝之田未
足以賦一畝笳鼓盈村擾及豚狗爾乃制為嚴刑迨乃
黃耆巨木囊頭重金繫肘臂無完膚指欲墮手谿壑之
填未厭伸暴之門何有于是子遺之民瘡痍之未斃于
敲扑困于征科者蓋淪胥以盡漸不可久矣戾氣醞釀
蒸為疫癘方且乘陽發騰擴不可制今枕藉而病卧者
比比皆是招醫降巫若憤若醉是其凍餒蝕于胃腸刑

罰慘其心志發雙伏而並攻何方藥之能治厥禍方萌
殆未知其所至也使壟畝之植一本而十岐共蒂而百
穗將安救之而客誇以為瑞哉且菽粟所以貴于珍鼎
布縷所以加于玄黃者為其有用也今夫用者徒存而
用用者已亡是謂隆虛而病實忘遠而娛細矣僕竊為
客贅而不取也客聞而憮然曰噫嘻有是哉子之迂也
信乎執一者未足與權二泥彼者不可與適此子徒鑒
于已已之變為流而不止乎是殆滯于陰陽之迹而未

深于斯理者也且夫於穆之化圜運不已剝終必復泰
因于否吉凶互尋禍福相倚夫蟲之蠕蠕也不屈不發
地之隆窪也不伏不起數逆斯通氣順乃死是故九載
之水或以成堯七年之旱終以啓禹子豈知夫凶儉之
後繼之以豐稔登進之漸承之以君子耶然而氣機橐
籥必有攸始兆先于物發遠伊邇鐘鳴而隕霜礎潤而
降雨走誠得于俯仰之餘是以釋近憂而崇遠喜也且
夫麥備四氣實首五穀詩人頌其於皇下氓賴以率育

續歲功于發春函潛氣而多淑是休嘉之先露後斯理
于將復示帝心之仁愛啓方來之祉福諒有開而必繼
孰無徵而乃獲走且與子託丘壑以優游咏皇風之清
穆是故有取于麥岐子何責之備而論之刺耶知知子
不能難客乃躡履而退曳杖而歌歌曰麥秀兮多岐覆
壟兮纍纍彼其之子曾是兮弗思于是知知子返乎潛
室沈思淵默緯情愔于渾淪抽端緒于開闢推玄化之
始終考休咎于遺冊覽春秋之所書測消長于三易道

有殊而歸同理既契而心戚然則客之言似亦未為失也將以厥明戒館客循阡陌辨麥岐之踈數聽鄰鄰之損益問勤勩于三時弔疾苦于緩急于時風輕景融煙朗霧清謝彫輿却繁纓被大練策溪藤道以童子從以經生指三汀以東鶩遵龍江而緩征瞻桑梓于原隰拜松楸于佳城睇海氛于極際儼波浪之奔轟感釣遊之舊跡慨歲月之不傳藹里墟之蔓延有孤物而屢更亦浮雲之多態何難樹而易傾悵久寄于異土心戀戀乎

故京方徘徊以瞻眺蹇徬徨而屏營顧見道左麥穗歧
歧本同末異旁無附枝始戟戟以競秀竟孳孳而莫攜
將神工之妙合復化鈞之巧持或雙昂以森矗或左右
以紛披或越畎而希挺亦共房而駢垂薄長颺以洄泮
照圓景而陸離等比翼于異類噬連理而不為固物薄
而稟厚騰衆喙以增竒胡哲人之超軼隨所如而見疑
昔宣尼之瑞魯匡人怪而圍之比干之忠殷曰不祥而
戮尸彼二聖且猶然般罹此又何辭抑軒輊之偶致將

彼蒼之有知于是歷覽既倦義馭未疲覽厥穎異采掇
以歸洵皇澤之滲漉拯黎民于阻饑託子墨以宣秘聊
洋洋以陳詞

松聲賦

瞿汝稷

昔人有謂絲不如竹竹不如肉者以其漸近自然也必
如斯言則孰有過于松風之為聲者耶客既有為之賦
者遂援毫而和之然聲彌妙則和彌寡深有愧于白雪
之音云爾其詞曰粵有逃虛之士淵尚之賓選八荒而

無悅渺萬物而寡鄰超人世而獨鏡廓杳眇以怡神迺
獨娛夫衆竅之諧會自然之雅音非絲竹而通美迭拊
遺鐘磬而觸石撻金並嶰谷以取韻託徂徠以標名實
惟要妙是曰松聲盖方風之起蘋末盛土囊而緣于泰
山之阿也維松固已灑然清矣及其飄搖叻溇蕭灑颼
颼竦萬尋兮忽舞徐波起而遠流盈空谷而澎湃映別
壑而澄幽林氣如此劃然成秋則又聳乎其足聽焉以
至清揚遐厲森沉沸渭上漢斯蜚稍雲慙憇夕颼振而

柯鳴涼颼引而條曳猿狖哀嘯乎其側飢飈呻吟乎其
內于是蕩養乎絕巘之下浸淫乎溪谿之澁截微徑與
荒丘經石林及花嶼衆芳盼蠻其全集輕靄霏微乎莽
際斯則蕭遠冲虛空澄幽翳似春雨兮滿江若廣陵兮
潮至涓子不能撫其弦韓娥不能宣其意以故天籟非
一松聲最矣松聲若虛會心契矣爾其絕迹箕顛逃名
首陽視揖讓兮喪道非放伐兮不王窅然天下喪頽然
出處忘澗戶無人兮濁世遠孤雲在岑兮獨徜徉惟聽

曉鶯變語春壑鳴淙和虛濤之遠寫足幽耳之笙簧若
夫幽窓獨坐泉石孤吟方弘景兮開逕及彭澤兮歸林
烟芊綿兮如織霞朗映兮清陰一鳥偏弄疎花冒淥聽
孤松之流韻似幽人兮整琴悠然忘世洗耳披襟至若
松子引年於緱嶺劉阮採藥于天台萬壑度盡生平始
來杳松聲兮喧聒使人心爽令人意哀莫不念仙期之
綿邈悔短計之迷回永結長生之願深盟鍊魄之懷別
有楚襄蘭臺之上漢帝蓬萊之旁玉樹磊夥雄風忽颺

並葱蒨以發韻惟松風兮悠揚上君玉堂入君洞房使
窈窕兮間靜俾君王兮清涼方欲輟洞庭之張樂罷鼓
瑟于瀟湘已矣哉松聲之為妙也是以至人聽之與道
若一洗心滌志含光去迹收無聲以為聽鑒至清以為
心與天逍遙與世陸沉冷然將御風而遐逝從列仙兮
無古今

荒菊賦

繆一鳳

賦菊之生于叢荒中也偶得是紙于倭餘殘篋揭而

軸之爰作短詞以自感

際大造之無私運玄樞而莫停受羣植以殊質咸飮氣
而暢生桃競春而夭矯蓮接夏以娉婷桐莫辭其早彫
栢孰遏其遐齡華不謝榮于東震葉何怨落于西成伊
順時而得序分品類以迭更苟至性之不易混荒穢而
彌清時迺尊收司令青女啓行稻方底于有實蒲已萎之
先零爾其挺紫莖于太皞標淑米于奇英葉盈盈而墜
露葩粲粲以欣晴含金精而內結凌肅氣以孤升味久

要乎蘭桂香結佩于荃蘅胡為乎不薦爾華屋執彼芳
庭護以彫楹列以彫櫺俱延賞而式燕備珍玩以怡情
競羣穠而進媚附衆治以爭呈念遺時之弗偶爰托根
于幽貞遵叢莽而挺拔並危石以崢嶸譬彼懷瑰竒之
介士不徇俗而沽名去故國之擯臣抱忠憤而孤征又
如斥嬪之失御蛟脩容以自珍處幽宮之岑寂低翠眉
而含情襲芬芳以勵志何憂乎邪妁之縱橫慨余植之
既晚顧操性之有恒諒時命之不忒顧歷蹇而終亨檻

寒芳以自蓄，寡竒馨而結盟。解余佩兮以贈友，斷余玦兮以明行。羌奚羨乎朝妍，而夕殞惟欽志于衆瘁。而獨榮嗟歲月之蹉跎，慮冰雪之交併。苟不隨雜卉以同腐，庶無忝于大塊之陶形。亂曰：荷彼佳人，洵清幽兮。彤霞為容，翠雲表兮。金莖為飡，佩琳璆兮。獨處空谷，懷蹇脩兮。秉志貞潔，孰可儔兮。秋水湯湯，思悠悠兮。邈遊從之，無使我心憂兮。

菊賦 李雲鴻

僕治詩經而詩之中多不言菊豈詩人有遺採與抑
物有幸有不幸與丁酉之秋天行多雨而山園叢菊
綽有幽致且把玩之際足以怡神爰作菊賦漫記其

盛其辭曰

惟玄黃剖判品彙分形宏括罔象細撮焦螟迅四序之
天吏煥五色于丹青是故芙蓉蕩漾于澤畔萸莢開落
于帝庭冰姿鬪粧于宮主紅衣迷艷于郎星雪染梨而
成陣壇依杏以鐫銘至若西施酒酣太真春睡澗林猶

恨其無馨也繡簇羅襦曉啼珠露石家方倚之為錦屏也萍一宵而七子松千禩而化苓詞臣草詔紫薇光燦

騷客豪吟新聲載播乎沉香之亭若乃韻友仙友端伯

寄輿含笑破憂衛足保孕

似證切

木筆絲毳異相殊稱

昌孕

切金鼎玉盤將離標勝或紛披鹿苑芝房之外或翦萃

離宮別館之中或檄孺齊州赤縣之北或鬱鞅海滢蓬

瀛之東巔崖峭壁顏郁鮮紅雕欄寶幃芳雜高叢繡織

局之毅紋刺蘭墜之女工紛泊蠶午盖巧厯所不能徵

陟隆切笑百卉既然菊當何以爰居上皇木橋草茂渾葭

蓀狂之封為石年君之所氏黃白入劑厥聲斯起日精

周盈爾雅分解舉履切籬綴陶潛之金英飫屈平之齒切

神于延祚而弭灾抑何美乎虎顧而鴟視稽僕下土世

奠丹湄謝人世之三窟卓天地之一錐羅恬夷之萬有

卻紛攘之九遠其山則白崖玉照杏兒臺子三峰嶠蚪

而岭嶮東嶺蟬媽而硯礪其水則丹江衍其派石港揚

其波瀟澗瀟澗泊岸浴沙桑阿切其產則電熒蘄芋路雙

巨勝蒼此崎廉計然難罄其士則少伯龍躍于中古浮
休蠖屈于末年諸范接踵文彩睽翩僕處此所謂大塊

私我以於暝而步武乎考槃之在澗

經天切

于是傍東阜

連西樊闢老圃開晴軒圖史牙籤而錦秩卉木蝟聚而
雲屯薙水臺之與地管藝節華之與蘭蓀是故孟陬之

辰青帝司令紅紫輝駢芳菲色競爾獨本枝暉賻

音蘊
蕪

若時保性既杜蜂罔復遠蝶騁比屆朱明曛熠登闕天
妖者炙之而瘁柔脆者觸之而傾方且治爾蠚去爾蝨

亭亭物表孰敢抗衡迨夫招拒秉樞辱收布政玉露波
浸商飈兵勁第見新羅翦茸而敷粉黃鶴崙茵而翻翎
紫綬綰金章以並蒂碧蕊含玲瓏以垂庭勝金綦黃遇
佛稔笑牡丹珍其嘉名芙蓉貴其雅號左漾倚泥右飄
窈窕蓮妬太液之穠毬奪香瓊之妙彼波斯之與揚州
特各取其速肖百種紛綸僅撮領要然且破萼芽茨不
厭其空吐顏玉砌不矜其豐辟則端人莊士龍德正中
堅持晚節無玷厥躬豈若宵夫儂子趨勢之矣而背時

之窮耶是故狂夫賞心以開口悶士寓目而舒衷蓋其
質介其德充也菊之時義洪矣哉此鼓城石湖蕪得著
譜而披金甲戰秋風聖祖取以志武其致則抹烟帶月
窺簾映戶醪醑可酣柘枝可舞僕即不能擅洛下以稱
名園亦可跨甘谷而為玄圃徵酒之壽蒐詩之伍一玩
忘形神再玩忘爾汝于是不知興之未盡神之莫逆乃
亂曰太素無色孰滋榮兮至人無物孰鍾情兮惟感懷
以揚聲敢命不律磨陶泓而摘辭于方寸之靈扃云爾

芭蕉夜雨賦

李蔭

猗綠蕉之茂止值陰雨之淒其顧幽人之閒寂撫斯景
以歎歎隔疏櫺而傾聽憂中來其莫支若乃聲之清也
比于綠桐中乎金石敗梧翼其酸楚哀蛩助其蕭索聲
之濁也若擊皮鐸若扣木鐘老鴉用以繼響狂蛙因之
糾訟聲之緩也將作復止方鳴乍歇似妍唱與良謳每
遲徊而不發聲之急也若千鱗跳瀨萬羽刷林亂簇倏
以破革羣手競以縱金至于仇之而親遠之而傍避之

而隨麾之而向苦覓疑于相干平侵建于相抗浙浙撼
乎肩山點點襟于心浪幽恨釀于眉端煩寃寄于枕上
縱善摹其莫詳雖工儼而難狀于斯時也乃有孤臣去
國遊子懷鄉郵亭瀟洒旅館昏黃抱書劍以愁絕對童
僕而徬徨既徙倚于危坐復反側于方牀挾飛霜以入
鬢攢利刃而斷腸思縮地于千里歎各天于一方知不
可乎奈何乃抵死而相當又有阿檻擯牆霜閨思婦歎
覆水兮難收仰嘑天兮莫訴蘭軒閉兮燈焰殘蕙帳空

兮螢火度君王絕迹兮長門宮蕩子從軍兮遼陽戍有
所思兮期不來欲往從之恐難遇玄結陰兮夜湯湯旦
何時兮淚交注聆滴瀝之苦聲想焦心而生妬思持斧
以運斤將斬葉而伐樹凡若此者皆牽于所遭之戚而
未得乎所植之趣者也若夫王孫公子高門甲第大譙
朋賓盛陳佳麗簾幙圍兮氛翳逋蠟炬烘兮夜堂霽剖
腴割鮮兮送水陸之珍竒換羽移商兮縱管絃之嘹唳
屢舞兮傴僂踏歌兮嘒嘒弄酒琰兮謹諄戲簪珥兮暗

墜雖畢命于明朝且暢情于斯際將俾晝以作宵又何
知夫寂寞之况味也耶此猶其淫樂者爾若夫禪房窈
窕琳館清幽一塵不染佳客來遊藝蘭芬于石鼎薦茶
味于磁甌或貝葉之三復或丹經之一抽或煩赤髭以
講西方之教或屈黃冠以闡柱下之猷清涼入肺腑爽
氣襲衣裘將興還偃息欲去且淹留若此者固宜累朝
暮而不厭又何知夫外物之相搗哉于是申之詞曰風
瀟瀟兮雨泠泠夜色穆穆兮漏沉沉形與聲兮兩相戰

芭蕉之上兮葉之心憂青玉兮峭稜濕碎鸞兮修尾羌
美人兮舞袖似半醉兮扶不起引愁緒兮填胸遶哀音
兮滿耳苟欲澹兮相忘在洞觀乎玄理吾心兮淨空纖
芥兮不容湛太虛之本體兮等震電于蟻螻將聲臭之
俱泯兮反造化于鴻濛

明文海卷四十四

欽定四庫全書

明文海卷四十五

餘姚黃宗羲編

賦四十五

花木三

落花賦

葉憲祖

武林張次公舊有落花賦膾炙人口余未之見也乙丑秋日晤次公于都門始得快讀才艷鮮穠情寄悽惻已極詞人之致第賦與興比不同始末詮叙各有

厥體茲賦縱橫言之若以之入歌行可與盧駱同風
余不揣蕪陋效顰一篇深愧拘于所聞聊博知己之

覽笑云爾

原夫芳藪茂苑綺合上林條風布暖淑氣垂陰吐鮮華
于雜樹紛麗色之交森臨軒之鼓堪催連夜之符待發
河陽之仙令爭看鄴下之清歌未歇恣王孫之宴賞兮盼
駐景于朝霞重騷人之題諷兮欲留春于碧月夫何容
華盡兮憔悴風雨妒兮飄搖含姿別幹抱馥辭條點蒼

苔而尚媚瞥秀目兮空撩惜繁英之易墜恨好物之非
牢繫惟綴庾嶺之瓊蕤發羅浮之清夢願瘦影兮雲橫
挹幽芬兮月送冷蕊驚飛闕山一弄迺若影碎百株之
錦春迎十里之紅指前村兮沽酒探御宴兮登龍殘粧
欲褪麗彩俱空粵若紅饒一捻欄開百寶姚黃魏紫傾
富貴之家國色天香極形容之巧會歡賞之無多亦摧
殘之恨早亦有西府之產特異垂絲之種還妍迎風兮
若纖腰之怯舞着雨兮宜冶態之增慙覓佳人于空谷

竟形影之難探若夫玄都之樹新栽紫陌之塵自滿憶
避秦兮何年嗟乞漿兮期短亂紅雨兮具如擲春風兮
不管復有西湖十里玉井一枝六郎之面姣好妖妃之
步逶迤勸紅衣之欲卸忽凌亂于漣漪爰及招搖之種
呂覽攸稱賁禹之樹禹經所嘗托幽叢于小山蕩天香
于雲外惟金粟之繽紛亦秋風之無賴于是花云異狀
落亦殊顏墜梨花之粉兮白晳灑杜鵑之血兮紅殷豆
蔻之相思散漫醑醑之倚駕闌珊木蘭飄雪薔薇隕露

榴照眼兮輸丹柳飛綿兮失素或繞砌以依欄或沾泥
而撲路其乍零也翩弱態于迴風其既落也付香魂于
流水蝶蹴舞於低枝燕銜歸於舊壘伊造物之多
情似裊裊而未已若夫身墜玉樓容悴壽陽咏寂寞則
阿嬌之長門乍掩悲棄置則班姬之紈扇初藏還故枝
而不得徒垂涕于空房嗟夫物疇榮而不萎世靡盛而
不衰信芳菲之易謝宜為歡之及時濡毫兮太息落花
兮凝思

狀元紅賦

蔣德璟

若夫金梭玉粟，龍牙麝囊，椰鍾黑葉，綠紗紺殼，朱
梯星毬，鷄肝霞墩，松蕾金線，冰團牛心，鵲卵淨瓶，蜜丸
夫固亞僕乎瀘粵，然猶閩圓之下丹也。往者忠惠之書，
遺于方氏，橋二百而為識，竟淪掩于鐸里。維鐸及奕，誕
降嘉誕，延壽是孳，祥井是汎，移紫度緋，灑藍心恥，流觀
夫伏燿秋回，百荔垂瀝，黛葆扈雲，彤實射暹，夜星晝燭，
圓蓋方陣，譬若火峯，其木不燼，又若琅玕，萬斛鳳丸，離

離芸風氣聞千步又若雒媛含辭未吐寒泉三尺深浴
天芳又若合德初出蘭湯廣上圓下皓肪中沒又若宜
主柔溫無骨霧綃半劈醴津斯曠龍漿斯落又若吉雲
露珠一勺昶膜醲英又若水晶榭核焦封又若丁香應啜
灰滅又若甜雪留芬射越弛服墜裾又若茵墀流汁入
渠故其冬青春榮之性絳襦玉膚之狀駁華辨艷之粧
蠲渴補髓之漣亮羣族之所伏嗟難得而覩况是以釵頭
盛鬢雙髻奉濁王娘鄣袂將軍攤獨服其實者挹膏漱

瓢為荔羨偃昔扶荔之宮積草之池金明搃風十不一
易若乃雒陽置于嶺南長安賁于巴蜀瀘部初哇明駝
暗翻撫酸苞而虛憐悵珠曆之已禿悵嬌環之解笑固
以瑊玦為結球忠惠之書攬二產汰閩江之陂謁未若
茲種累厯乎三十二之外重曰震氣五滋狎獵的纒生
代巧兮荅還蚌胎誰其冠者繫延壽兮元鼎風堦宣和
航尾珍非質兮皇罕連實願登上林比禹橘兮

弔落梅賦

譚宗

歷長安道幾徧其為土無幾何皆惡也日亭午猶平
分之加晡則七之即晨起幾于無土矣乃者忽見片
梅於道殊不知其所自驚眎却步愴焉感懷為落梅
賦以弔之夫梅又曷嘗不以落終然昧于時非其壑
予亦何為而不弔耶既而慰之明情以理申不敢漫
為不平徒相與以無益也其辭曰

越歲淵獻兮實維京師厥月臘蜡兮躅躅塗泥爰有梅
華兮零落道旁旋步却顧兮不知所從嗚呼彼梅兮生

有定處匪山及泉兮必亭與野胡茲不辰兮遭逆多故
不榮而枝兮迺戕於路播彼林薄兮偪此溝瀆剥其馨
澤兮入於臭惡竟與烟露相失兮滲矢為親烏免違惑
兮犬豕蹂躪存莫驩鳴兮亡誰哀些戴天徒高兮履地
安大覆品藻於學士兮孰庸庸之論破揜粧靚於隅世
兮空美人之思慕縱軒騎之迨還兮疇復下而問之感
匹士之拓落兮獨為文而唁之訊曰哀哉世事之不可
憑兮唯遭逢之為政也抗則雲而抑則淵兮蓋物固有

其命也瑚璉登於廟堂之上兮右太羹而左玄酒及其
飢棄瓦礫兮牧豎攫之以啜行潦故夫神龍天矯於田
間兮狂童不敢指而為言假而受困於虺蜉兮雖仁人
未必見之或憐奄淒淒其猷却於條枚兮實爾帶之不
固爾既漂墮不得集於鈿頸乎亦所際之不遇爾麒麟
繫纍于罷牛之後兮即安所缺望爾實乃華萼之聖喆
兮母為凡木而失足而悵悵雖身周於糞兮不過皮髮
之滓溼苟此心之潤玉兮夫誰不奉之以芳潔

明文海卷四十五

欽定四庫全書

明文海卷四十六

餘姚黃宗義編

賦四十六

器物

奉制撰蟠桃核賦

宋濂

洪武乙卯夏五月丁丑上御端門召翰林詞臣出示
臣桃半核盖元庫內所藏物也其長五寸廣四寸七
分前刻西王母賜漢武桃及宣和殿十字塗以金中

繪龜鶴雲氣之象後鐫庚子年甲申月丁酉日記其
字如前之數亦以金飾之所謂庚子實宣和二年字
頗疑祐陵所書既奉旨譔賦垂誠方來臣瀛謹按王
母獻桃事詳見張華博物志第八卷史補類華言桃
七枚大如彈丸遺帝五自食其二以今核觀之且十
倍於彈丸則其實之如斗可知矣豈華出于傳聞而
想像載之歟抑其言足信而後之好事者假托傳會
之歟不然漢武內傳所謂桃如鳧卵形圓而色青者

又果何如歟復按蔡京所記尚方有玉母蟠桃核頗
鉅京嘗相祐陵其見與今相符事當可徵然則傳志
所載誠有不可信者歟臣敢忘其固陋謾賦一篇俯
伏丹陛以獻初則極其形容終則一歸于正其詞曰
炎漢六葉實惟武皇闡坤符握乾綱祀汾陰建行宮仁
獸在郊赤芝薦房西海獻續弦之膠弱水來燕卵之香
慶諸福之畢集思騎龍于帝鄉幸靈桃之入口傳仙種
于下方想其瑤階露寒彤庭秋迥銀燭未掩畫屏斜映

啟承華之秘殿，眇瑤池而神騁。忽王母兮遙臨，托青鳥以傳命。鬱佳氣之蔥籠，覲芳姿之妍靚。于是玳席初延，霞觴屢傳。蘭辭吐兮襲人，縹袂舉兮高騫。紫雲之韜輶，暫駐九微之燈火。猶然乃啟錦幃，乃濯翠籩。乃出桃實，獻于帝前。味甘醇而如醴，色含腴以不乾。鸞刀割蜜，神液流泉。上滋華池，身輕欲仙。將懷核而種之，斲上林之寒烟。王母微笑塵境，易遷儻花實之。並見歲屢閱于三千，唯紫府之列真。視滄海于桑田，彼窺烏牖之小兒。尚

奚測夫幽玄斯核也匪鑄而成非陶而凝藉五行之亭
毒資六氣以流形鄙瓠犀之脆薄並玉質之堅貞爪之
不入叩則有聲知何年之中折存半壁之晶瑩俯貼金
盤巢蓮之龜仰承玉露常滿之栝銳首聳兮尖岑豐下
楸兮楸狹長也隆壘眾皴蹙背文之籀一窪暈面色之頰荷
盤欲展蚌甲未扃藏仁之跡猶在含肌之躄如生函肉
好之隱約圍合線之交層龜鶴軒翥兮顯象寶車絢爛
兮金明鳳卣鸞彝同藏真于大府星形月魄挾灑氣于

蓬瀛嗟夫自昔仙靈惚恍難憑出無入有變幻莫停插
類盡今巴園棗如瓜兮漢庭恣燕齊之方士騁詭辨之
犇騰瞻雲路之咫尺恨凡骨之難登以雄才之蓋世甘
昏溺而不醒至若建章月淡甘泉風冷銅莖中峙仙掌
高擎望颺輪兮不來徒馳情于窈冥苦白日之易短兮
竟莫制于頽齡核雖存而人則逝兮悲秋風于茂陵矧
宣和之繼軌兮慕鼎湖之龍升托青華之帝子設神霄之
玄稱何殷鑒之不遠踵覆轍其相仍天啟皇明真人龍

興順堪輿之大化調陰陽之至精道德行兮即龍虎之
丹顯忠信昭兮勝鉛汞之功弘以九州為仁壽之域躋
兆民于喬松之朋神機流浹太和薰蒸指佞人兮草生
屈軼齊氣朔兮階秀堯堯視區區之遺核初何係乎重
輕此所以革違古之荒唐法唐虞以作程也評曰桃有
核兮大逾掌歷千齡兮多惚恍慨靈仙兮勞夢思誰見
昆丘兮紫芝長真人出兮海寓寧禮樂為冠兮仁義作
纓簫韶九成兮鳳凰鳴青鳥不敢徠兮幻說清千秋萬

歲兮永長生

椰子酒瓢賦為知滑縣事諸君仲仁作君前雷州

遂溪縣丞宋訥

祝融之荒朱崖之疆有木維椰花實同芳葉毳毳乎鳳
尾樹彷彿乎檳榔融瘴雨之滋養受海風之吹揚凝鯨
波之潤澤孕蜃氣之光芒竹長節兮下生雀五色兮上
翔採一殼之貞姿破半瓠之異常不深而玄不老而蒼
訝琢疑雕離圓遯方謂為飽耶而非濟水之具謂為螺

也而無掩甲之銚制作合自然之度規模豈杞柳之戕
薄臨池之荷杯輕隨波之羽觴尊藤瘿兮土苴卮竹根
兮糝糠憎一杯之鸚鵡妬雙盞之鴛鴦斟酌乎真一之
醞輸寫乎波若之揚納翹生之風味支陸醑之壺觴齊
列並陳雖翠勺銀罌之屬無忝先後爭操競執雖稭康
阮籍之徒亦效奔忙注春色于蒼顏添風韻于紅粧踈
水部之醒何親酒泉之渴羗素過乎陶匏之質貴饒于
金玉之相箕山之許由未棄陋巷之顏子不將若夫公

子高樓豪客盡堂銀屏前列綉幙後張薦瓊酥之炙鵝
封杏酪之蒸羊綠醅漲竹葉之釀紫霞溢葡萄之漿夜
月秦若蘭春風杜韋娘或妙舞兮垂手或清歌兮遠梁
巧笑仙容轉宮腰之倚難懷春翠袖露玉笋之纖長澆
彼磊塊之胃傾此瀦灑之香銀鑿落兮在側金叵羅兮
在傍瓢于斯時孰低孰昂負清標與雅致任酣顛而醉
狂又若幽人草亭高士山房詩禮之庭翰墨之場逍遙
兮蘭佩葛巾優雅兮野服雲裝杜窳半開香膿醜乎蟻

綠耶筒初斷色淺泛乎鶩黃縷銀絲之鱸膾研金膏之
蠙匡新洞庭之綠橘嘉糟丘之紫薑冠者數人童子兩
行再獻不假于歌喉一傾直潤乎詩腸滴殘瀝于布袍
散餘馨于銀鐺瓢于斯時價比琳瑯視金壘而不眦顧
瓦盆而有光有美一人邦家俊良典六藝于文教肅三
語於憲網蔚贊畫之才華近池上之鳳凰出貳遂溪來
宰靈昌昔訪茲瓢得于雷陽封以溪藤之紙韜以蜀錦
之囊逮琴堂之公暇時會友以徜徉精翹藥以作醴潔

甘旨而起嘗味過杜康客邀宋庠幕賓之丰儀俊逸廣
文之環珮鏗鏘掛一幅之墨梅設四位之胡床蕪水沉
兮霏微燒銀燭兮熒煌乃命愛子鑰啟筠箱出清賞于
勝集樂良夜之未央蔬如瓊芝果剥栗穰有佳山雉味
美河魴一酬一酢和敬交彰一奠一舉賓主相忘延席
上之歡伯拓樽前之醉鄉引青州之從事啖湯餅于何
郎宜賢侯之特達重此噐如圭璋嗚呼海中之洲瓊山
效祥實產椰子大小莫量懿為瓢而為榼亦風土之木

強來中華兮萬里幾山海兮梯航物遠見珍愛之恐傷
木靈知毒驗之允臧杳窮陬之地理恨考索之未詳吾
將假之過黃公之壚持之喚西家之墻曠席地而幕夫
脫聲鎖而名韉屬一瓢于海神追祕怪于渺茫酌一瓢
于坡仙子謫居之聞望盡南海于一吸嗽嶺島之風霜
倒着白接籬翻污雲錦裳揖羣彥兮歸來拂醉袖于練
緗承主人之索賦聊染翰以成章願常加乎洗滌示清白
以保藏

風箏賦 凌翰

梁苑王孫身閑情逸悅目怡神假是長物伐竹淇園構
胎產骨或方或圓六出八出鏤花剪綵錦文素質宮姬
刺綉絢以五色白黑丹青紅紫綠碧炫耀輝煌文成黼
黻曳以修尾流蘇累百長徽竟天數千萬尺手不能舉
輓轡收縵於是乎乘其高墉假以人力憑虛御風頓生
羽翼始扶搖而直上旋夷猶而反側爰飄颻于九霄乃
周游於八極快萬里之鵬翮奮千仞之鳳翼扶白雲以

斜飛與紅日而翱翔既前軒而後輕復左低而右昂自
已至申而不倦歷東轉北而靡常日云昃矣返照生光
素帶流金翩其煌煌美麗當空蔚乎文章景星卿雲天
孫錦裳亦有鳴聲鼓出千囊六鷁退飛言駕彼蒼二三
其偶盤舞頡頏爾其卷舒進退悠乎洋洋瞰視下界民
物阜康士女盈盈諦觀仰瞻叶側兒曹拍手攔街似狂
上盼乎九重之顛下臨乎百里之外大塊假之以噫氣
雲達動之以天籟隱而不見沒於靈霄顯而于飛垂翼

翾翾橫出蔽天有豐其旆日入而息一卷以退系歌曰
世路坎坷兮城守堅飛樓高舉兮臨塵闈虛實洞見兮
惟紙鳶肉骨委地兮推肺肝太平無事兮飽饗殮錦衣
綉裳兮金玉冠挾茲飛舞兮薄青天遊行盱豫兮聊自
歡焉得風塵永永不動兮天下安如山

摺扇賦

楊循吉

當溽暑之蒸鬱咸浹背而汗流雖四海之遍爾在江南
而為尤况城郭之逼側復塵土之飛浮思清風以如渴

畏重締而若仇于斯時也吾無廣堂大厦高亭曲榭披
襟向阻散髮未暇興維水鏡之懸心繫冰壺之掛荷陰
點點而遙隔重湖竹影蕭蕭而遠違僧舍使吾局束乎
放逸之懷偃蹇乎空濁之狀恨八溟而猶隘嗟六合其
非曠于時則有祛炎雅製却暑芳姿昔日之班姬所詠
往年之逸少曾持斂之不盈于把圓也有中乎規出袂
而輕颯自動拂膺而涼颼允宜觀其皓灑裁容素藤張
面洒金星以作飾削牙釘而為鍵紫檀擻擻而板肋無

痕玄珠團團而蒂垂如鋹爾乃寒韻來權熾威亡酷偏
宜掌握之攜豈用僮奴之撲蕪鄰座而颼颼及旁賓而
簸簸快哉何爽甚矣其樂然而先生方且撫髀三歎仰
屋長吁吾適于此有熱者乎蓋三邊多重鎧之甲士而
四野足赤背之農夫也

竹夫人賦

徐肇惠

歲是戊戌六月既望徐子燃香鼓琴啜茗摘調據胡床
以清嘯陟雲麓而棲遲於時新篁解籜薰風襲衣午睡

未振頽然枕書恍兮惚兮乃夢一姬不事靚粧有綽其
儀邂逅覲我遂締交頤素心虛朗談笑寡施余頤而駭
曰噫嘻天女仙娟雲容月姿胡為乎來茲哉詢其所自
迺歛衽而對曰妾在湘江之陽黃岡之陂英皇之遺裔
也武昌之譜可考而知周轍既東鳳鳥絕棲吾族斯落
一至於斯降自五季風會益趨七賢長逝六逸謝歸雖
衛武公之宴賞樂天氏之品題蘇長公之結契清虛子之
徘徊而時事已日非矣于是溪悲巖淚本撥夫離姊妹

妯娌莫知東西飄泊天涯烟雨寒淒獲見君子妾之幸
與既而又訴曰妾非巫山之媛亦非洛浦之妃自我祖
以來秉持高節歲寒不渝家襲清脩淇園卜居慵事鉛
華羞競妍媸故將托身於賞音也君其憐之余曰噫嘻
靜笑一矣不可狎矣枕席之娛得無褻歟于時翠蓋停
停蓮娛笑迎迺執齊紈乃邁冰音迂新姬於合沓奏鳳
管於良辰須臾清風入帷明月當庭涼颼薦爽桂魄流
馨逸而非肆樂而非淫余戲之曰子誠德輝之良儔也

盍贈以徽稱姬笑對曰幼字青娥長呼湘雲時移物換
潛踪晦名君其謂何余曰子有婦德內助孔殷秦虢之
號可以褒尊于時侍女繽紛皆稱夫人稽首欽承莫敢
僭陵姬曰妾聞寵渥者疾甚恩深者妬生祇恐白頭吟
作團扇歌興秋風寂寞寒月淒清當斯時也君尚念此
否乎余曰嘗聞貞女矢操義士秉心與子偕老千秋百
齡汝勿猜也於是相與歡娛於竟夕而不覺東方之白
已生寤而視之四顧無人惟有竹奴在伴流鶯數聲噫

嘻異哉乃一夢耶

鐵硯賦

王文祿

後周桑維翰屢試不第人嫌姓請改翰不答撰日出
扶桑賦以見志又鑄鐵硯以自誓志壯哉予嘗撰日
升滄海賦擬之戊辰試春宮南還有感翰志復撰斯
賦云

萃五金之精質兮特鑰石之凌汞鉛招歐冶鼓橐籥兮
肅壇宇而吉蠲排乾坤之爐鼎兮秉洪鈞惟太玄文武

火以調燮兮任龍虎之熬煎爛光華之五采兮渣滓淨
而迴旋啟矧範以肖硯兮蘊日月與星纏非琢削以成
象兮較端歛而相懸稽硯譜之莫載兮拔硯品其逾千
滴蜀峽之湍水兮簇煤黛之雲烟迅寒暑之代謝兮恒
黽勉以磨研乎忠信之貞確兮縱堅剛而必穿利筆鋒
之橫劔兮揮波濤于剡箋下深入于厚地兮上高出于
穹天列左右俱阻喪兮匹無敵于後先岱宗砥且礪兮
黃河流而帶牽海底渺生塵兮唾舌耕夫硯田崇誓願

于厥初兮烱歷劫之彌專豈衡鑒之罔徹兮雖鬼神亦
垂憐幸資言以獻身兮展平治于堯年阜困窮之億兆
兮靖海島及三邊渾六合猶一家兮溥霖雨以窮源鑄
硯置其鑄志兮師苦卓之鑄顏何曳白之不濡黑兮每
棄擲之如甕奈滔滔之若是兮肆鑽刺之黃緣凜棟撓
之覆餗兮孰佛時之仔肩運拙以轉巧兮忍九仞而舍
旃昌糜于好爵兮每遐慕于神仙塵闕設未透兮殆心
丹之難全負堂堂之大器兮恥雕虫小技之尚慳再髡

穎而涸勺兮抵皓首猶奮然傲童蒙之瀆兮異出谷而
喬遷以硯相麗澤兮奚祇三絕乎韋編奪錦標于金馬
兮驚春雷之躍淵快飛騰儼冲舉兮增氣槩于山川鐵
硯化為鐵券兮同國祚之綿綿

續蒲團賦

毛愷

予既續黃鵠先生中流砥柱賦矣先生又示以蒲團
賦焉既伏讀之縱橫馳騁極其辯博不待上林子虛
已令人有飄然凌仙之想私心竊慨慕焉因復續之

黃鍾畢奏瓦缶繼陳故知不倫矣其詞曰

夫何有物之輪囷兮肆編蒲之所為質既柔而且溫兮
體圍圓而中規豈天孫之織巧兮庸畀夫靜者之為繫
君子之假憇兮曰維宜夫好修頤茲蒲之為物兮紛芊
芊于河之許謝芳敷于春風兮薄言采之于秋暮濯之
以沸百之湯沐兮晞之以九曜之陽光迎鸞刀之既解
兮又擣之以玄石之琳琅于是弗緣機杼拊据成章製
非示辱之鞭藉豈安車之箱爰為團席何用匪臧其為狀

也厚不踰寸闊不盈方平若周砥潔于截肪團團類月皎皎疑霜一經一緯有抑有揚層見叠出錯綜相當如鱗之次比甲之光熨帖外示蘊藉中藏相罩為之左次華璣于焉下堂諧孺子之木榻侶幼安之藜牀彼芙蓉兮繡褥洎蜀錦兮文茵毼毼五色龍鬚千金皆豪貴之所事非有道之宜珍孰若茲物之樸雅邈幽貞之遐心當夫落花滿徑綠陰牕映南薰徐來簾垂晝永其盤薄也可以理素琴之無絃閱黃庭之內景又或銀河淺清

紙帳夜明爐烟乍燼蝶夢未成其枕籍也可以委天地
之至和吸沆瀣之元精至若緣諦白蓮之社跡斷紅塵
之境世諦盡脫凡慮悉屏趺坐堪結上乘之胎內觀可
熟大丹之鼎然此特裨夫肥遯者之資而非志于吾道
者之所須也若乃挾以入孔氏之室坐以待周公之旦
閉門著書期登道岸爾乃織塵不凝匪石不卷參承座
下罔辭困頓力佐夫下帷之憤功倍于懸梁之半是其
為器也雖眇而其有助于崇德廣業也亦豈片言可殫

哉故顏生坐忘于心齋諸葛高臥于廬間子厚見易于
臯皮司馬警德于枕端斯皆不出于几席而表聲光于
四寰吾嘗有感于數子故兀然默隱于蒲團

轉注壺賦

陳柏

伊誰氏兮巧思爰範錫兮為壺既藏水以作鼎更畜火
而為爐口孤懸兮峭直腸九曲兮迴迂其酌而注也隨
多寡以為乘除其瀉而出也任緩急以為盈虛不寒不
烈匪疾匪徐制既備夫衆美名應取諸六書爾其青春

方麗白日未晡皓月流彩素雪平鋪奏妙曲於下廡飭
嘉餽於中厨集文園之詞客會高陽之酒徒因攘袂而
長嘯爰拍手而狂呼興既乘兮不淺情復決兮未疎相
與歎洽寧復超超將千巡兮不足且一飲兮無餘歷舞
筵兮傿傿入醉鄉兮蘧蘧曾知夫光陰之為過客與天
壤之為寄居

破硯賦

孫七政

歲壬午之秋季予訪虎賁陳君於清溪之灣板屋棊

几卉木萋然齋名卧雪破硯在焉展玩良久慨歎興
憐遂援毫而賦之曰

粵此硯之本來乃帝家之珍異穴端溪之片玉蘊溼雲
之沈紫舍故墨于非烟溢餘光于星紀辨剝蝕于篆書
識思陵之竒字年何代兮流落代何人兮擊碎別故
井於頽垣將千年兮萬禩竝幽魅以為家隨劫灰兮共
死始何為兮忽離終何故兮復萃將造物之無心何倚
伏之多秘抑萬物之見重咸完合以珍傳獨將軍之寶

此豈破離而棄捐謂缺陷之世界多毀好而忌全况此
硯之離合實神物之微權惡全軀之非夫故玉碎於人
間厭守故之未竒復葆光於重泉雖毀方而瓦合隱墻
東而頽然辭匠石之小知獲懸解之大年卒相時而顯
晦效秦璽之輝纏始分交於有激終膠合於鳳弦噫嘻
嗚呼君知之乎彼大塊兮為硯雖舍默而虛無一離一
合兮幾推琢一治一亂兮幾研磨何堅貞之不脆何太
白之不污豈若茲硯之似道得逍遙之妙避陽九於前

元希明光之顯耀吾將佩此硯以為弦韋匿雕龍兮
守玄豹孫生季子聞而歎曰世喪形交道尊神合無用
為用元光煒燭因復為之贊曰

故井頽垣獲帝宮之佳玩破坳殘石竟合璧於文房千
年廢棄一朝重劫灰為鄰溢精光古來聖哲多類此寶
劍不死亦不亡

輕車強弩賦

樊鵬

自古名將至漢衛霍李耿尚矣然皆以輕車彊弩立

功絕域可考而知也時遠人亡缺于講究司馬松石
劉公至則仰承上意宣布德威勞心竭智遠求往古
近咨羣議手造輕車強弩二事曲盡其妙朝夕教演
士氣百倍套賊聞之徙其營數百里固匪直利戰守
而已也為賦以識之

其一輕車

惟物有輪

徑三尺一寸

厥輪惟隻

凡車皆雙輪此惟一輪鞣濶四寸厚二寸

輻貫

于頭

如常車頭木徑五寸以家榆槐木為之

串樞中結

樞即管軸以鉄為之重一勛五兩徑

一寸串在軸外以鐵為之重六兩 犬牙相制周旋僊僊戮力同心厯軌

躡艱居左有箱箱可以扱二塊塊長二尺一寸五分橫一尺二寸三分取下則為二

牌持以居前有牌猛獸以趺牌高下四尺五寸橫二尺八寸畫猛獸形如走狀

四目斯張火兵之穴上一眼發神鎗佛郎機有法三等高一法遠一百步中五尺打馬上

人以漸近下前轆後軫施以梁柱前中轆二長四尺七寸後轆長二尺九寸

五分肘轆中箱傍闌中箱兩傍闌干高一尺四寸五分立柱六**卧板堅巨**兩傍

底板長二尺四寸五分濶九寸厚一寸八分上有**前後**穩坑陷火銃其中坑末加鐵排椿以防銃後坐

雙足前則二足活止則下地行則縣之長**後傍匣堅**後二尺四寸五分後二尺不動長二尺

高六寸濶一尺四寸深九寸五分施軫上有蓋以盛火藥左右兩箱各濶一尺五分高四寸深七寸以盛鉛法

子利刃森列

開兩斧二鎗二鉤一小旗二

龍筒欲吐

中上施箭筒長二尺六寸濶七

寸五分面如九龍筒以放火箭

夾耳

夾耳以木為之

荅背

以毛麻為之

鐵鎖靚護

左右

鐵鎖二條長六尺止則聯于鹿角環為營

員者象天方者象地四象八卦各

有倚附廣受重任萬事咸聚三人輓之可以超堵防守險要過絕奔旅以壯國威用揚我武請問其名夫是之

謂輕車

其二彊弩

惟物有肘中下峯起

肘長二尺九寸前高二寸七分濶一寸一分後高二寸中肘下有眼

高三分

徑引繩壘平如止水其上維何蓋梁覆之

蓋高三分

長二尺六寸

其下維何虛中承舉厥容有槽所容惟一

槽深三分半濶如

厥發有機聽命行止

機左右二以牛角為之長四寸

五分濶一寸厚二分五厘鐵軸

二各長一寸八分低昂以發矢

下

鐵為之鍙方員長一尺五寸半二長七寸鐵拴一長一寸八分鐵軸一長一寸八分鐵考蓋絆一長四寸鐵軸

一長一寸三分蓋軸一長三寸弩牙角一塊長一寸濶一寸厚五分鍙以脚踏之上弓弦上手持

端橫置弓兩弦

抱倚

弓長四尺六寸濶一寸六分弓稍桑木二長一尺五寸方二寸弓胎桑木二長二尺濶三寸厚二寸

弓把桑木一長一尺濶二寸厚二寸弓面牛角二長一尺八寸濶二寸弓弦二條每條用絲一兩五錢箭長六寸五分重四錢四分箭頭長一寸重二錢一分厥色雜共七寸五分重六錢五分前二分後三分有三等

黃厥形維諾虎兕其力賁育莫比攻彊存弱適遠在邇體巨用細重本輕枝誅戮先醜貫堅披靡風疾及利動弗逾軌百發百中宣威萬里廣敗成功恭危不死既破銳師亦攻固壘請問其名夫是之謂彊弩

前破械賦

徐渭

嗟乎哉西河殘守東海孝婦差之豪釐千里岐路寸脰

尺支二木一金昨日何重今日何輕其在今日也栩栩
然莊生之為蝴蝶其在昨也遽遽然蝴蝶之為莊生

後破械賦

徐渭

爰有一物制亦自斑鶴喙琴體乏絃乃偕二友木實金
紐與之為三脰及足手一人邇之不棺而朽多具高義
隨我四年我分殉之何心棄捐二三神明駕鵝其首司
其去留為我撞剖嗟乎哉

捶錢賦

葉憲祖

歲丙寅余濫司鼓鑄之役故事錢非式者捶之因感
其不才見棄有似乎人乃為之賦

原夫周立九府秦等三幣操子母之權精郭輪之製足
國便民斯惟其利象諸面以尊王喻之泉而布地因以
傳於中古是不一名五銖謝事亦仄代興呼統床之阿
堵冠童子以上清爰及明興水衡是掌局曰寶源百流所
仰余承之於司園愧心計之惘惘陳而觀之美惡攸殊乃
有非幼非壯不範不模違錯刀之金飾類緹環之薄膚

蓋萬選而莫中將一擲而若無於是命朱亥之椎碎鄧
通之鑄紛如委地曾莫之顧若風前之榆莢兮零落而
何依似禁中之蝶翅兮彫傷而孰護入君平之卜肆兮
無媒掛阮郎之杖頭兮空慕讀選詞之銷漏信于今而
不誤余乃喟然太息有感斯人一經廢置復進無因緊
惟抱槩之子挾策之賓眼迷日色額點河津痛劉蕡之
下第歎季子之長貧乃至宦轍多岐君恩不保身依沁
水之陽夢斷長安之道嗟屈子之將沉悵馮唐之未老

亦有虎頭殊相猿臂自雄鎬未鳴於沙漠劍莫倚夫崆
峒從軍失路荷戟悽風若夫曠日盟寒紅顏命薄溝中
之水徒寫怨於棄捐篋底之紉詎甘心於寂寞斯其揮
斥異狀寥落同悲惟余心之多戚親斯物而顰眉吾所
願者大造假我以爐鞴授我以鉗鎚使夫成毀一好醜
齊爾各適其用而吾無所用其捶

布賦

徐獻忠

邑人以布縷為業農疇之困藉以稍濟然其為生甚

疲苦非若他郡邑蠶繅泉亨之業力少利倍者可同語也然天下所共衣被而詳其喪者甚寡于是核其事告諸觀風者作布賦

客有至吳下邑覽織婦之布素歆卉物之流澤收島夸之末計啟閨房之長息廼喟然而歎曰美哉布也是固一匹可以愧盜心不得千金之償約者歟何齋者之逐逐而拾者之董董也下邑之士曰羅紈繡文素縹錦綾長裾交緯流景飛晶此居者之所揚輝而觀者之所疑

睇也子不是慕而慕諸貧民之業亦有說乎客曰布通
貴賤之服不擇溫涼而適其為製也疏陋縑繒密殊絹
縠有絬毳之毛毳齊縞素之潔白賤靡綺之浮華傷貝
錦之徒飾孺夫匹婦可濟其乏缺通都大邑與千乘之
富相埒豈虛言哉曰子何不傷其勞而徒羨其美不稽
其私而徒夸其會子亦欲聞其勞且病乎若乃鐵木相
軋手挽足壓且餒且勑且出絮吐核張弓挂弦弦急聲喧
牽條絡車呶啞錯雜借光于膏繼夜于日心急忘寐力

疲歌發衾篋空寒漏水寂溢婦子喧闐老穉畢力客曰
若是勞乎曰未也嫠婦卷袖妖姬解珮含秋入機凝寒
弄杼流蘇綰綜一伏一起踏躡相次上下不已縷斷苦
接梭澀恐膩手習檻匡聲揚宮徵長夜凄然得尺望咫
寒鷄喔喔解軸趨市方是時也母聞謗而不暇投杼妻
迎夫而帖然坐起客曰若是勞乎曰未也織婦抱凍龜
手不顧匹夫懷饑奔走長路持莽莽者以入市恐精粗
之不中數飾粉傅脂護持風露摩肩擘以授人騰口說

而售我思得金之如攫媚賈師以如父幸而入選如脫
重負坐守風簷平明返顧客曰若是勞乎曰未也婦辭
機而望遠子牽裳而慙饑先潔釜而待米旋汲水而候
炊語少待以相慰既久竚而始歸夫嬰嬰以捐涕云攘
攘者在途索子錢而不釋併布母以如飛夫狼攫虎噉
肉寒骨解無一語之抗聲猶三嚙而稱怪握兩手以授
之拂空拳而吞歎雖卒歲之靡從完小信而不忘是豈
但一婦織而衣十人殆所謂一室肥而衆俱瘵者也客


曰若是病乎曰未也海上之民土薄水淺其惡易遘朽
腹者未知其稅駕鶉衣者徒羨夫長袖夫廣儲豐積出
自農夫之耕一絲寸縷皆從匹婦之手然而繭絲告成
置蚕不問耕犁召豐於牛何有是固天下之同風惟江
南為叢藪晦鍾之他稅從升塗泥之末路計斗是以手
不停機而終歲無衣窮年乞乞而不瞻其口客曰何言
之過也滄海變遷化為陵陸禹土塗泥廕注淅淥禾黍
芑芑滿家彌谷貧攜自墮富樹華屋婚媾靡徒侶簇

簇顧今日之江南殆海內之樂國雖有布縷之征亦豈
加於穀粟何徒抱杞人之憂損名都之望乎曰否否不
然恒歲之運水毀木饑消長相代前建後除陽九陰七
聽命皇祇今昔庚申火仇馮夷炕令爍金天漢飛灰槁
土沃焦赤地拆龜既癸藜之莫采亦木縣之變哀枝無
垂拔絮罕歲蕤傾筐脫負米掇支離寡夫臃腫哲婦鴟
夷里胥蹠躩督郵喧脛無尺寸之可縫况網運之雀魏
匪凶歲之取盈抑國計之在茲當是時也雖使星婺獻

技火鼠脫鬣整大夏之全產省公儀之百室徧陽不懸
於城雉匡廬借練於飛瀑亦何以應之客曰嗟哉下邑
之民若是病乎曰未也工以習勝巧自技生傷末路之
靡淫變素樸為華英始力作以助農終緝麗以耀名競
良工之巧思幻化國之神能於是飄絮若蓬刻縷若鬣
積歲成匹累織敵絨廣倍乎東海之二尺袤齊乎別渚
之五虹鑿以團鳳繞以飛龍綴金章以錯緣變猩草之
鮮紅爛太霞之朝采奪景鳥之晶瑩袷已浮乎龍水綃何

羨乎鮫宮蓋其技巧始於渡海之黃嫗章聞出自戀
闕之鉅公忘萬家之膏腴邀一日之歡悰傳觀內近遂
入公宮一匹遂抵于千緡聯筐始達于重瞳民已窮而
益偏霜既結而冰從嗚呼嗟乎筠鬻竹杖天馬蒲萄通
西國而開越雋窮異詭而馳臆胸啟皇武之遠畧羣臣
騫之作備朝權不思其暮落寒灰尚戀夫冬烘竟殘桃
之取戾何獻曝之耿衷方今聖主龍飛問民疾苦諸非
著令改不暖坐首蠲茲役卹我隕仆尚衣之絺繡有章

進御之浮靡不取免徭征之巨累思息肩而就臥雖紅
紗之網運尚存而貂璫之督課稍安客乃瞿然作而言
曰甚哉鄙人不知民之病苦若是也九月授衣猶以為
晚終歲作勞祁寒不免吾又何敢袖手以向人徒負暄
而思暖



明文海卷四十六